

Abdullah mahu Melayu hebat politik, ekonomi

Oleh FAUZI JAAFAR
dan YULPISMAN ASLI

KUALA LUMPUR 9 Mac - Datuk Seri Abdullah Ahmad Badawi mahu persaingan dan strategi yang digunakan oleh orang Melayu untuk menguasai politik digunakan pula bagi menguasai ekonomi.

Perdana Menteri berkata, orang Melayu bukannya tidak boleh berniaga tetapi mereka perlu membina keupayaan berteraskan ilmu yang boleh memberi keyakinan kepada mereka untuk bersaing dalam dunia perniagaan.

Bagaimanapun, kata beliau, orang Melayu tidak mempunyai semangat untuk bersaing terutama dengan usahawan kaum lain dan mudah putus asa ketika berhadapan dengan masalah perniagaan.

"Saya malu. Saya bukan nak perleceh bangsa saya, tetapi sekadar memberi mak-

lum balas," kata beliau dalam ucapan perasmian Kongres Jihad Ekonomi 2007 dan pelancaran Akademi Kecemerlangan Perniagaan Melayu (Gabex) di sini, hari ini.

Turut hadir ialah Menteri Pelajaran, Datuk Seri Hishammuddin Tun Hussein; Menteri Besar Selangor, Datuk Seri Dr. Mohamad Khir Toyo dan Pengerusi Gagasan Badan Ekonomi Melayu (Gabem), Tan Sri Rahim Tamby Chik.

Kongres selama dua hari itu yang bermula hari ini dijangka merintis jalan mencari pendekatan alternatif kepada penyelesaian masalah ekonomi Melayu.

Abdullah berkata, orang Melayu lebih gemar berpolitik khususnya untuk mendapat kuasa di dalam parti.

"Oleh itu, mereka berebut-rebut (jawatan), buat fitnah, mengata, mengumpat... semuanya kerana kuasa. Tetapi tidak pula berebut dalam ekonomi," tegas beliau.

UM - 10/3/2007

**Mereka berebut-rebut (jawatan),
buat fitnah, mengata, mengumpat...
semuanya kerana kuasa. Tetapi tidak pula
berebut dalam ekonomi**

**ABDULLAH
AHMAD BADAWI**
Perdana Menteri

Perdana Menteri mengakui bahawa tanpa kuasa politik, orang Melayu tidak boleh maju seperti yang ada sekarang.

Bagaimanapun, tambah beliau, orang Melayu tidak boleh bergantung kepada kuasa politik selama-lamanya.

Katanya, tanpa keupayaan dalam bidang ekonomi, kuasa politik orang Melayu tidak akan kekal selama-lamanya.

"Kalau kuasa politik tidak membawa kejayaan kepada ekonomi, satu hari nanti kuasa politik milik orang Melayu akan hilang.

"Hilang politik kerana tiada ekonomi, sesat politik kerana tiada syariah," kata beliau.

Sehubungan itu, beliau menasihatkan orang Melayu supaya bermuhasabah diri, melihat kesilapan yang pernah dilakukan dan meneliti kelemahan yang perlu diperbaiki.

Katanya, kegagalan adalah satu tragedi manakala kekecewaan merupakan pengajaran yang pahit.

"Selama tiga tahun sembilan bulan saya belajar politik setelah tercampak keluar daripada politik. Saya belajar daripada (episod) itu dan sebab itu saya ada di sini (sebagai Perdana Menteri).

"Kita mesti muhasabah diri. Jangan menyalahkan orang kerana agama mengajar kita untuk muhasabah diri," jelas beliau.